



VriendenKoor ECHt:



'VriendenKoor ECHt', in Ech en ómstreke leefkozendj mieë bekèndj es "de Zank oet Ech" bestuitj dit jaor 125 jaor. 'n Lustrum det 't koar zal viere mit talloze activiteiten, die passe in de langjäärigje traditie van 't koar. En die traditie moog d'r zeen. De redactie van de Aestergezèt daok in de archieve.

Eigelijk bestuitj de Zank al 165 jaor. Van 1865 tót 1875 woor d'r al 'n Echter 'Liedertafel', die loesterdje nao de naam 'VriendenKoor'. Dit koar belaeftje häör hoagtepuntj rónjd 1875 mer koom jaore later in 'ne neerwaartse spiraal terech, dae oeteindelik lèdje tót de opheffing. Gelökkig waerdje in 1899 initiatieve genómme vöör de heropricting van 'n zangvereniging in Ech. Op 6 januari 1900 vónj de offesjele oprichtingsvergadering plaats. Daoróm det de Zank dit jaor häör 125 jåorig jubileum viertj.



Wis g'r trouwes det in de beginjaore 'VriendenKoor' neet allein 'n zangvereniging woor, mer ouch 'n bleujendje toneelaafdeiling haw en, jao zelfs, 'n hermenie-aafdeiling. Dees hermenie-aafdeiling stèldje neet zoavöl vöör en waerdje nao 'n paar jaor alweer opgeheve. Dit kèntj neet gezag waere van de toneelaafdeiling. Talriek zeen de (korte) toneelvöörstèllinge die tiedes kónserte van 't koar waerdje opgeveurdj. Mer vöör roemrucht zeen de groate aopelóch oetveuringe in 1912 ('Wittekind', 'de afgodendienaar') en 1919 ('De Slotvrouwe van Ech'). Van dees lèste gedramatiseerdje sage in vijf bedrieve waerdje in de buurt van hoeve de Horst, aan de randj van de Daort, mer leefs nege oetverkochdje vöörstèllinge gegaeve, gevolgdj door drie ouch oetverkochdje oetveuringe in 't aopelóchttheater in Arnhem.


De periode 1925 tót 1970 waerdje vöör gekènmertj door suksesvolle deelname aan kónkoerse in bönne-boetelandj. Prachtig gekalligrafeerdje oorkondes in 't archief van 'VriendenKoor' getuge van ieëste prieze in de aafdeilinge 'Uitmuntenheid' en 'Excellence'. Dök mit 't hoogste aantal puntje. 't Streve nao perfectie is in die periode óntwikkeldj en kenmerkj 'VriendenKoor' tót op de daag van vondaag. 'n Hoagtepuntj in dees periode woor zeker de kónkoerdeilname in 1938 in Breda. 'n Verslaag van de fieëstelike óntvangs en

hulde die de Zank bie aankóms in Ech ten deil veel is op pagina 72 te laeze.

Óndanks 't feit det 'VriendenKoor' altied al boete Ech furore maaddje mit sjoan optraejes volgdje vanaaf 1970 pas ech de periode van de groate kónsertreize. Ónger angere Trier, Keulen, Wenen (2x), Budapest, Regensburg, Parijs, Thüringen, Wales, Salzburg, Antwerpen en Haarlem hawwe 't genoeg óm kènnis te make mit 'VriendenKoor ECHt'. Neet vöör niks neumdje vöormalig börgemeister Heemskerk 'VriendenKoor' "Ambasadör van de gemèndje Ech". De leje van de Zank dènke nag dök mit vööl genoeg aan dees bezunjere reize. Zie zoewe mit plezeer dees gezèt gans wille vööl mit verhaole. Verhaole, die aaf en toe mer baeter bönneskamers kènne blieve. Dao is de redactie van de Aestergezèt 't hieëlemaal mit èns.

Bie de besjrieving van de rieke historie van de Zank moog de nekke bandj mit vastelaovendj in z'n algemeenheid en mit de Aester oet Ech in 't bezunjere neet ónvermeldj blieve. De oetdrókking "Veer hènj op eine boek" is hie zeker van toepassing. W'r duke d'r èns verder in.

Al in 't verre verleje, óm persies te zeen 1910, troch 'ne groate optoch door Ech mit aan 't ènj 'ne praalwage mit de bekèndje dokter P.H. van Kempen es Prins Pepijn van Herstal. Van Kempen woor toen bestuurslid van 'VriendenKoor', óm vervolgtes van 1912 tót 1969 vöörzitter te zeen van 't koar. Bair Smeets woor in 1938 't veerdje actieve lid van de Zank det de ieër haw zich te moge toaje mit de Prinsevaere. Hae ging es Prins Bair I vöör in de Echter Carnaval ónger zien motto: "Gaotj neet eweg, mer veertj de carnaval





al 125 jaor hofleveranseer van Prinse in Ech en òmstreke!



in Ech". Hae deej dit mit zoavööl äövergave en passie det hae mer leefs veer jaor achterein waerdje verkaoze tót Prinscarnaval. 'n Unicum!

In 1958 maakdje de Zank 't hieëlemaol bóntj. De zengers presenteerde zich es 'n kómpete carnavalsvereniging mit 'ne Raod van Elf ónger leijing van Prins Clement I. Zelfs 'ne hofnar óntbroek neet aan 't gezelsjap. Woor dit waarsjenlik de aanleijing óm in de kern Ech weer 'n offesjele carnavalsvereniging op te richte? Waem zal 't zègke.

De 2de Prins van C.V. "De Aester" koom alweer oet de geledere van 'Vriendenkor'. Vöole zoewe nag volge. Neet allein van de Aester oet Ech, mer ouch van zóstervereniginge. 't Ómgekierdje gebäördje trouwes ouch. Auwt-Prinse óntdèkdje det det zènge in 'n koar 'n prachtige hobby is en det 'Vriendenkor' ouch 'n ech koar van vrunj is. Oeteindelik moog neet ónvermeldj blieve det de Zank ouch 'n aantal druimers herbergtj; manskaels die druime oats eine kieër Prins te waere, mit de kop in de wolke en de naas in de wèndj. 't Zulle waarsjenlik altied druimers blieve.

Mer wie kómtj 't eigelik det de Zank zich mit rech hofleveranseer van (net neet) Prinse in Ech en òmstreke kèntj neume? Eder jaor zeen d'r weer vööl gegadigdje vöör dees felbegeerdje positie, mer jaomergenóg kómtj neet ederein hievöör in aanmerking. Dit haef te make mit de strikte vöörwaardes die gestèldj waere aan dees functie. Zoa deentj de nuje Prins 'n sosjale, representatieve, zelfbewuste, sympathieke, empathische, mer vöör al ouch 'ne fanatieke carnavalsvierder te zeen. Zeen det mesjiens ouch de karaktereigesjappe die kenmerkend zeen

vöör de zengers van 'Vriendenkor'???


In waatfer jaor woor waem (Net Neet) Prinse? Kèntj g'r de (Net Neet) Prinse in de gooj volgorde plaatse? En waem van hun is noe nag stieëds actieve zenger? Stuur eur oplossing nao secretaris@vriendenkoorecht.nl en maaktj kans op twieë vriekaarte vöör 't prachtige jubileumkónsert op 8 november a.s.

De Zank is natuurlik neet allein hofleveranseer van Prinse. Gehieël in de traditie van de vreugere toneelaafdeiling waerdje door leje van de Zank regelmaotig opgetraoje bie de humoristische Aesterparades. Dit lèdje dök tót groate hilariteit van 't aanwezige pebliek. 't Koar haef ouch hieël dök mitgedaon in de groate optoch in Ech en daobie dök kleine vöörstellinge opgeveurdj, die neet allein door 't pebliek mer ouch door de jury gewaardeerdj waerdje.

Versjillendje baekers staon noe nag te blinke in 't home van de Zank op de Mertstraot. Biegaondj e paar beeldje van de sjoan creaties:

1986: de Zank zeukjt eine tolk | 1989: de Stopera vanne Vonk | 1992: de Goudvènke vanne Zank | 1995: de katers op moezejacht | 2003: Oze wins, eine Fusie-Prins.

De verbónjeheid van de Zank mit vastelaovendj beperktj zich neet tót allein C.V. "De Aester" oet Ech. Ouch mit zóstervereniging "De Aester Sjaelen Uul" oet Pej haef 't koar altied werm benj gehadj. 't Hoagtepuntj van dae bandj koom óngewiefeldj tót oetdrökking bie de unieke vastelaoveskónserte in zaal Biej Aolders in Pej. Bekèndje leedjes waerdje door dirigent Jan Teuwen van toepasselike dialekttekste vöörzeen. Same mit de ónvolpreze hofkepel van VV "De Aester Sjaelen Uul", artieste es de bekèndje sopraan Margriet Laumen-Schlössels en de zanggroep Averegs haef de Zank d'r toe biegedrage det in "Groat Ech" noe nag stieëds trök verlangdj weurtj nao dees prachtige middige.





JÓNGES van DE Zank



"Hiej zeen weer, wille ós veurstèlle. Den wètj geer, wo geer op kèntj tèle. Mit muziek, veule weer ós hieël riek. Kómme weer hiej en zinge mit plezeer. Eders kieër, aug noe weer. Drage bij mit kleur en klank, Jónge van de Zank".

Es dees melodie klinktj wètj g'r wie laat 't is. De Jónge van de Zank staon in de startblók óm weer 'n spetterendj optraeje te verzörge. 't Recept is dudelik: nao de herkenningsmelodie volgtj 'ne medley van eige werk en bekèndje mitzengers, dök mit eige tekste.

't Enthousiaste pebliek geitj pas ech oet häör daak es 't lèste leedje klinktj: "In d'n hemel is de hël los...t daak geit d'r vanaaf...!"

In 2005 óntstóng bönnè de Zank 't zoagenaamdje 'Klein Koar'. Alweer 20 jaor brènge de Jónge 'ne lach op völe gezichte. Anger repertoire en ouch 'ne angere doelgroep kenmerkjt De Jónge. Opgetraoje weurtj vöral in 't vastelaovessezoen. Dènk aan de (senioren) zitting van de Aester en de Bóntje Aovendj/Middig van de Aester Sjaelen Uul. Ouch op 't PlatsSpektakel zeen zie 'n vaste waarde. Daonaeve brènge de Jónge vreugde in völe verzörgingshoezer in de regio. Ouch det kenmerkjt 'Vriendenkoor' Echt.



JuBileumconcert Vriendenkoor

Zoa-es al vermeldj bestuitj 'Vriendenkoor Echt' dit jaor 125 jaor. 't Koar haef stieëds aangegaeve dao 'n bezunjer jaor van te wille make wobie ze 't ganse jaor de bevolking van Ech en ómgaeving wille boeie en verrasse. Det geitj zeker lökke es se nao hun programma in 't jubileumjaar kiks. Op zaoterdig 11 januari höbbe de völe aanwezige al kènne geniete van hun nuaorskónsert. Det woor vief daag nao 6 januari, de exacte datum det 't koar 125 jaor bestuitj. Zóndig 13 april is d'r 'n jubileummès wobie 't 125-jäörig bestaon weurtj gevierdj in kómbinatie mit de herdénking van 80 jaar bevrijding. Twieë gebäörtenisse die hieël sjoon same gebrachtj zulle waere in 'n Heilige Mès. Den is d'r op zaoterdig 8 november 't groate jubileumkónsert en op 21 december 'n Kerskónsert. Tössedoor zeen d'r nag optraejes die neet specifiek aan 't jubileum te koppele zeen mer waal mieë den de meujte waard. Dènk bevöörbeeldj aan 't Octaaf van Sjaelberg en de jubilarissemès.

Hoagtepuntj is natuurluk 't jubileumkónsert op 8 november 2025. Köste nag meujte waere gespaardj óm daovan 'n bezunjer festijn te make. Es ieëste al de ster-gast dae 'Vriendenkoor' haef weite te kóntraktere. Francis van Broekhuizen, neet allein ein van de bèste soprane in Nederlandj mer ouch 'n innummendje, humorvolle vrouw die zangkoare 'n werm hert toedreugtj. Francis en 'Vriendenkoor' zulle behalve operarepertoire same ouch versjillendje verrassendje angere meziekstökke oetveure. En de aankleijing van 't kónsert, de bezunjere effekte en de angere gaste zulle de toesjouwvers verrasse. Francis kreeg naeve operazangeres landelike bekèndjheid door versjillendje tv programma's zoa-es "De slimste mens" en "De verraders". Aafgeloupe seizoen stóng Francis in 't theater mit de Reisopera in "Piratenkoningin" es Grace O'Malley. Op 19 november versjeen häör tweedje boek "Schandalig mooie opera". Sjoan verhaole äöver 't wel en wee in de operawaereldj. 'n Book det Francis haef gesjreve nao aanleijing van häör gelieknamige sukses tournee same mit Gregor Bak. Kortóm 'n gooj raeje óm de aktiviteite van 'Vriendenkoor' in 2025 good te volge op Social Media, www.vriendenkoorecht.nl en in 't Waekblad.

